

# DBKL diarah buat tinjauan, pemantauan berkala

**Kuala Lumpur:** Isu kebanjiran ribuan warga asing di pusat ibu kota tidak akan selesai tanpa penguatkuasaan.

**“  
Saya maklum dan  
berterima kasih kepada  
Pasukan Gerakan Am  
(PGA), Polis Diraja  
Malaysia (PDRM) atas  
tindakan menyerbu dan  
menangkap Pati  
di Jalan Silang  
Dr Zaliha Mustafa**

Menyedari perkara itu, Dewan Bandaraya Kuala Lumpur (DBKL) diarahkan melakukan tinjauan dan pemantauan berkala terhadap premis perniagaan di sekitar ibu kota.

Menteri di Jabatan Perdana Menteri (Wilayah Persekutuan) Dr Zaliha Mustafa berkata, tindakan itu bagi memastikan isu seperti penyewaan lesen perniagaan kepada warga asing tanpa dokumen

sah dan pengambilan pekerja dalam kalangan pendatang asing tanpa izin (Pati) dapat dibanteras sebaik-baiknya.

“Saya maklum dan berterima kasih kepada Pasukan Gerakan Am (PGA), Polis Diraja Malaysia (PDRM) atas tindakan menyerbu dan menangkap Pati di Jalan Silang di sini, dua hari lalu (Khamis).

“Saya juga sudah mengarahkan DBKL melakukan tinjauan dan pemantauan berkala terhadap premis perniagaan di sekitar Kuala Lumpur,” katanya, semalam.

Beliau turut mengingatkan pemilik premis perniagaan supaya mematuhi peraturan ditetapkan DBKL khususnya membatkan Pati bagi mengelak risiko penarikan atau penggantungan lesen perniagaan mereka.

“Saya menyeru semua pemilik premis di Kuala Lumpur menggunakan saluran yang betul jika berhasrat untuk mengambil pekerja asing dan mengelak dari menggajikan Pati,” katanya.

Harian Metro Khamis lalu melaporkan, seramai 1,101 Pati ditahan dalam

operasi bersepadu di ‘Mini Dhaka’ di Jalan Silang, di sini.

Operasi bermula jam 11 pagi itu disertai 1,138 pegawai dan anggota dari Jabatan Keselamatan Dalam Negeri dan Ketenteraman Awam (KDNKA) membatkan Bridged Tengah PGA, Pasukan Simpanan Persekutuan (FRU) dan Unit Anjing Pengesan (K9).

Serbuan itu dilakukan hasil risikan dan maklumat berkaitan kebanjiran warga asing serta aktiviti jenayah di lokasi berkenaan.